

Kilang kaca tidak cemar alam sekitar

Kerajaan negeri beri jaminan firma patuhi aspek teknikal JAS

16 Nov 2016 Oleh Amir Mamat

Kerajaan negeri memberi jaminan kilang kaca, Xinyi Glass Group, yang beroperasi di Lipat Kajang, Jasin sejak Ogos lalu, tidak akan menyebabkan pencemaran alam sekitar.

Serentak itu, Ketua Menteri Melaka, Datuk Seri Idris Haron, menampik DAP Melaka kerana menimbulkan isu berkenaan.

Katanya, dakwaan bahawa operasi kilang itu menggunakan arang batu tidak tepat, sekali gus membuktikan DAP membuat kenyataan dangkal dan mengelirukan orang ramai.

“Mereka (DAP) menimbulkan isu ini tanpa membuat penyelidikan dan kajian, secara tidak langsung membuktikan mereka menolak usaha kerajaan negeri menarik pelabur ke negeri ini.

Guna gas asli

“Ingin saya tegaskan, operasi kilang kaca itu tidak menggunakan arang batu, sebaliknya menggunakan gas asli yang dijamin tidak mencemarkan alam sekitar,” katanya dalam satu kenyataan, di sini, semalam.

Dakwaan kilang kaca itu yang akan menggunakan arang batu, dibangkitkan Ahli Dewan Undangan Negeri Ayer Keroh, Khoo Poay Tiong, pada Sidang Dewan Undangan Negeri, bulan lalu.

Pengeluar kaca solar dunia

Xinyi Glass Group yang juga pengeluar kaca solar terbesar dunia dan kaca apung ketiga terbesar dunia serta mempunyai teknologi terbaru yang boleh dikongsi dengan

Malaysia. Pelaburan syarikat itu selaras dengan dasar kerajaan negeri untuk menjadikan Melaka sebagai Negeri Teknologi Hijau.

Idris berkata, syarikat itu mematuhi semua aspek teknikal yang disyaratkan oleh Jabatan Alam Sekitar (JAS), malah mendapat kelulusan Kajian Penilaian Kesan Alam Sekitar (EIA) pada 22 September tahun lalu.

Katanya, syarikat itu juga menggunakan sistem pemantau secara atas talian, terus dengan JAS.

“JAS juga boleh menjalankan pemantauan tanpa notis kepada syarikat berkenaan setiap bulan bagi memastikan ia sentiasa mematuhi syarat ditetapkan,” katanya.